

2 Korin

Naoa itəm tatol kəiu lan itəm Pol təməte tuwın kəm iəfak mın ikin Korin

Nəghatən əkuəkır rəha naoa u 2 Korin

?Pah təməte naoa u? Aposol Pol təməte naoa u.

?Təməte tatuwın kəm pah? Təməte tatuwın kəm niməfak rəha Korin, ne iəfak mın rəha profens Akaea.

?Nəmegəhən tahro nulan nian təməte? Pol tinəməte rəkis naoa kisił mahl-ipən kəm niməfak rəha Korin. Inu naoa itəm tatol kuwit lan. Məto naoa itəm tatol kitiəh, ne naoa itəm tatol kisił, ilau kəmiakə. Naoa itəm tatol kəiu, inu 1 Korin, kən e naoa u in təməghat əskasık kəm ilat məmə okotəg-ətuatıp-in nolən rat mın rəhalat, kən in təməgətun mın ilat e natimnat pişin mın neen. İlat tepət e niməfak kotətəu-pən nətəligən rəha Pol itəm təməte e naoa 1 Korin. Məto neen əh-ikin, ilat koatən məmə Pol in sənəmə etəm-iasol, kən təsətuatıpən məmə in otəghat min nəhlan. Kən ilat koatən məmə in tatol wək rəhan o nosən əm mənı.

?Təməte naoa u o naka? Pol in təməte naoa u matəgətun məmə in aposol kit, kən Uhgın in təmosipən wək u kəm in, kən tətuatıp əm məmə in otəghat nəhlan kəm ilat. Kən in tolkeike məmə otən-iəhau nəgətun eiueiuə mın itəm koatatıg Korin.

Pol təmən təwır kəm ilat

¹ Io Pol, itəm Uhgïn təmıtəpun e nəwian məmə io aposol rəha Kristo Iesu, iatəte naoa u itımlau piətət Timoti. Naoa u tatımnə kəm itəmat, niməfak rəha Uhgïn əpəh Korin, ne iəfak mın ilat rafın əpəh ikın Akaea.

² Pəs Uhgïn Tata rəhatat ne İərəmərə Iesu Kristo, okuawte-in nəwırən ne nəməlinuən kəm itəmat.

Uhgïn itəm tatol kepin netəmim

³ Pəs kotənwıwi Uhgïn, u in Uhgïn ne Tata rəha İərəmərə rəhatat Iesu Kristo. In Tata itəm in nəukətin nasəkitunən, kən in Uhgïn itəm nol kepinən rafın tətisi-pən ron.

⁴ In tatol kepin kitat e nəratən rafın rəhatat məmə kitat kotıtun nol kepinən netəmim e nəratən pişin pişin mın. Kən kitat kotal kepin ilat e nolən rəha nol kepinən itəm Uhgïn təmol kəm kitat.

⁵ Tahmen əm e nəhməən itəm Kristo təmos, təmuwa mın e nəmegəhən rəhatat. Kən e nolən kitiəh əm, Kristo in suatıp məmə nol kepinən təmuwa pik e nəmegəhən rəhatat, kən roiu nol kepinən rəhatat tatuwın mın o netəmim pişin pişin mın.

⁶ Okəmə itımat ekoatəto nəhməən, nəhməən əh tatuwa otımat nian ekoatən-iarəp namnusən təwır, kən namnusən təwır əh otol kepin itəmat mosmegəh itəmat. Okəmə Uhgïn təmol kepin itımat, tatol məmə itımat ekotıtun nol kepinən itəmat. Kən noan nol kepinən əh, tatoe-in e nəmegəhən rəhatəmat, kən nian nəkotatig e nəhməən kitiəh əm itəm kitat kotatig lan, tətasiu etəmat məmə onəkotətul əskasik matuwın matuwın.

⁷ Itimat emotələhəu-pən əskasik rəhatimat nətəligən o Uhgın otəmat məmə onəkotətul əskasik. Tol nəhlan məto-inu kitat rafin koatatig e natigən kitiəh əm məmə, itəmat nakoatəto nahməən itəm ekoatatig lan, kən tahmen-ahmen əm məmə nakotos nol kepinən kitiəh əm rəha Uhgın itəm emotos.

⁸ Piak min ne winik min, ekotolkeike məmə nəkotitun wir nian əskasik min itəm emotatig lan e profens ikin Esia. Nəratən asol min kəmotu itimat, taprəkis-in nəsanənən rəhatimat, təmol nikitimat təht məmə okəm-naka ekotimis.

⁹ Nipahrienən, itimat emotəto məmə kinəgəhan-in rəkis itimat məmə ekotimis. Məto nian əskasik min əh kəmotuwa məmə esotagileən etimat, məto ekotagile e Uhgın itəm tatol etəm təmimis təmegəh min.

¹⁰ In təmosmegəh itimat e nəratən asol əh itəm təmatuwın o nimisən, kən in otosmegəh itimat e nəratən itəm otəpanuwa. Emotələhəu-pən əskasik rəhatimat nətəligən lan məmə in otosmegəh min itimat.

¹¹ Kən in otol nəhlan nian nakotəfak otimat məmə, netəmim tepət okotənwiwi Uhgın o natimnat wir itəm in otol kəm itimat məto-inu netəmim tepət kəmotəfak otimat.

Pol təmauhlin rəhan nətəligən o rəhan naliwəkən

¹² Roiu ekən nəghatən u məsaulisən məmə, e nətəligən rəhatimat, nikitimat təht məmə esotolən nat kit tərət e nolən rəhatimat. E nolən min rafin itəm emotol, itimat emotətəu-pən suatip itəm Uhgın təmitəpun məmə emotəghat ətuatip əm moatən əhag-əhag nəghatən. Emotol nolən əh kəm

netəm əpnapın əm rəha nətueintən, kən motol taprəkis kəm itəmat. Esotəghatən e nitunən əm rəhatimat rəha nətueintən, məto emotagile əm e nəwırən rəha Uhgın.

¹³⁻¹⁴ İatən nəhlan məto-inu, esotəteən nəghatən kit itəm tiəkis otəmat o nafinən, o nitunən nıpətın. Roiu, nəkotitun məsın nətəligən rəhatimat, məto iakolkeike pık məmə nian kit onəkotitun rafin. Kən e nolən əh, nian İərəmərə İesu otuwa mın, itəmat onəkotagien otimat təhmen mın məmə itimat ekotagien otəmat.

¹⁵⁻¹⁶ Məto-inu enitun məmə nakotagien otimat, nıkik təht məmə nian ekatuwin Masetonia, ekaupən mımınə məplan itəmat, kən nian ekıtəlig Masetonia, ekımnə mın məplan itəmat. Tol nəhlan, nakatos nəwırən mau kəiu. Kən uarisig e itəm mın əh, onəkotasitu lak motahl-ipən io ekuwin nitən Jutia.

¹⁷ ?Nikitəmat təht məmə, nian emol nətəligən mın əh, məto emol əpnapın əm? ?O, kəm-naka nətəligən rəhak təmisi-pən e nolən rəha nətueintən, təhmen e netəmim itəm koatən “əwəh” ne “kəp” e nəghatən kitiəh əm?

¹⁸ İtəmat nəkotitun məmə Uhgın nian rafin tatol rəhan nəghatən, kən io mın, rəhak nəghatən kəm itəmat sənəmə, “əwəh” ne “kəp,”

¹⁹ məto-inu rəhak nəghatən o Nəti Uhgın İesu Kristo, itəm eməhalən-iarəp kəm itəmat itiməhal Saelas ne Timoti, sənəmə, “əwəh” ne “kəp,” məto e Kristo, nian rafin rəhak nəghatən in “əwəh,” in nıpahrienən.

²⁰ Tol nəhlan məto-inu, nat əpnapın nəniəkisən kuwəh Uhgın təmol, ilat kotuwa nıpahrienən e Kristo, inu nəghatən “əwəh” rəha Uhgın. Tol nəhlan, e Kristo, kitat koatən “Amen, Əwəh” kəm Uhgın, kən moatıləs-ipər nərgin lan.

²¹ Uhgın əm tatol itimat ekoatətul əskasik e Kristo kitat min itəmat. In təmitəpun kitat,

²² kən təmol mak e nəmegəhən rəhatat məmə kitat rəhan min, kən təmələhəu-pən rəhan Narmin e nikitat məmə kitat okotitun roiu məmə rəhan nəniəkisən min, ilat rafin okotuwa nıpahrienən e nəmegəhən rəhatat o nian kit.

²³ Kən roiu, okəmə esənən nıpahrienən, pəs Uhgın otol nalpınən kəm io. Eməsuwamən Korin məto-inu esolkeikeən məmə ekən nəghatən əskasik kit kəm itəmat.

²⁴ Esotolkeikeən məmə ekotərəməyə e nahatətəən rəhatəmat, kəp. Məto ekotol wək kitat min itəmat o nagiənən rəhatəmat, məto-inu itəmat nınoatətul əskasik rəkis e nahatətəən rəhatəmat.

2

¹ Tol nəhlan, enən rəkis e nıkkik məmə okul esimnə minən məplan itəmat mol nikitəmat tahmə.

² ?Emən nəhlan məto-inu, okəmə ekol nikitəmat tahmə, pah u ikin-un otol io nıkkik tagien? Itəmat əm, itəm emol nikitəmat tahmə.

³ Kən eməte naoa əh, məmə nian ekimnə, esətoən tərət e nıkkik. Esolkeikeən məmə netəmin itəm okotəkəike motol nıkkik tagien, ilat okotol məmə ekəto tərət. Eməte naoa əh e nolən əh, məto-inu

enitun mämә kitat kitiah әm, kән nian nikiк tagien, kән nikitәmat min tagien.

⁴ Tol nәhlan, nian emәte naoa әh kәм itәmat, nikiк tәpou pik otәmat, kән nikiк titәgit, nahui nәmtәk taiәh otәmat. Esәteән naoa әh mämә otol nikitәmat tәpou, mәto emәte mämә onәkotitun rәhak nolkeikeән asol otәmat.

Aluin nolән rat min rәha nol tәfagә

⁵ Etәmim itәm tәmol nәratән, tәmol io ekәto tәrat, mәto tәmol itәmat раfin nakotәto tәrat pik, mәto esolkeikeән mämә nәghatән rәhak e nat u in tәskasik pik.

⁶ Nalpinән itәm itәmat tepәt nәmotos-ipән kәм in tinahmen.

⁷ Mәto roiu әh, nәkotәkәike motaluin rәhan nolән rat kән motol-wir nikin, mämә nikin otәsәpou pikән mol tәme e rәhan nәmegәhән.

⁸ Iatәtapәh әskasik otәmat mämә nakotuwin motol tәwir kәм in mämә in otitun rәhatәmat nolkeikeән rән.

⁹ Emәte naoa әh kәм itәmat mämә ekәplan mämә onәkotol nәwiak e natimnat раfin, o kәp.

¹⁰ Okәмә itәmat nәkotaluin nolән rat rәha suah kit, io min ekaluin rәhan nolән. Okәмә suah әh tәmol nat tәrat neen mämә io ekәkәike maluin rәhan nolән, mәto enaluin rәkis rәhan nolән e niganәmti Kristo. Emol nәhlan mämә otasitu etәmat

¹¹ mämә Setan otәsәrәkinән kitat e rәhan neiueiuәән min, mәto-inu kitat kotitun rәkis rәhan nәtәligән o nolән nәratән.

*Netәmim itәm koatән-iarәp
namnusән tәwir*

12 Nian emuwın əpəh Troas o nən-iarəpən nam-nusən təwır rəha Kristo, eməplan məmə İərəmərə təmol suatıp kəm io.

13 Məto esatig əməlinuən e rəhak nətəligən məto-inu, eməsəplanən piak Taetas ikin əh. Kən emauiatipin ilat, miet muwın Masetonia.

14 Pəs kotənwiwi Uhgın, məto-inu in təmol win e rəhan tikimır mın e nəluaginən. Kən tahmen e kig kit itəm təmol win e nəluaginən minatitəlig matit rəhan mopael mın ne rəhan tikimır mın, Uhgın tatit itimat e Kristo. Kən itimat rəhan mın netəmim itəm ioatən-iarəp nenatigən rəha Kristo, kən nenatigən əh in tahmen e nəmiəwın kit itəm tatuwın ikin pisin-pisin mın.

15 E niganəmti Uhgın, itimat ekotahmen e nəmiəwın rəha Kristo kəm netəmim rafın, netəmim itəm Uhgın tatosmegəh ilat, ne netəmim itəm okotuwin e nalpinən rəha Uhgın.

16 Itimat nəmiəwın rəha nimisən kəm neen itəm tatəgətun ilat məmə okotimis. Kən itimat nəmiəwın rəha nəmegəhən kəm neen, itəm tatəgətun ilat məmə Uhgın otosmegəh ilat. ?Kən pah u titun nolən wək asol əh?

17 Məto itimat esotahmenən e netəm əpnəpın mın, itəm koatən-iarəp nəghatən rəha Uhgın o nos əməh məni. Kəp, məto Uhgın təmahl-ipən itimat, kən e Kristo, itimat ekotən-iarəp namnusən təwır e niganəmti Uhgın, kən nəghatən rəhatimat təmisi-pən e nikitimat itəm tətuatıp əm.

3

¹ Okəmə naka nikitəmat təht məmə enoatıləs-ipər itimat məmə itəmat onəkotegəhan lan. Netənim neen okotəkəike motos naoa kit itəm kəməte elat nian koatuwin o netəm kotəruru ilat. ? Tahro nikitəmat təht məmə suah kit otəkəike mäte naoa nəhlan etimat kəm itəmat? ?O, tahro itəmat əm nakotolkeike məmə onəkotəte? !Kəp!

² Itəmat atip əm nəkotahmen e naoa itəm tatol əp wək rəhatimat. Naoa əh kəməte-pən e nikitimat, itəm netənim rafin koatafin kən moatitun.

³ Itəmat noa rəha wək rəhatimat. Kən nəmegəhən rəhatəmat tatəgətun məmə itəmat naoa kətafin itəm Kristo təməte. Kristo təməte naoa əh e Narmin Rəha Uhgın itəm tətəmegəh, mətə təsətəən e nelmi etənim. Kən in təməsətə-pənən e kəpiel epin-epin, mətə təməte-pən e niki netənim.*

⁴ Itimat esotəgınən o nənən nəhlan otəmat mətə-inu itimat ioatətig e Kristo, kən moatahatətə əskasik e Uhgın.

⁵ Nikitimat təsəhtən məmə itimat əm ekotahmen o nolən wək u, ne noan rəha wək. Mətə Uhgın əm tatol məmə itimat ekotitun nolən wək.

⁶ In təmol məmə itimat ekotahmen məmə ekotuwa rəhan iolwək min rəha nəniəkisən wi rəha nasituən itəm Uhgın təmən. Nəniəkisən wi əh təsisipənən e Lou itəm kəməte, mətə təmisi-pən e Narmin Rəha Uhgın, mətə-inu Lou itəm kəməte tatol məmə netənim koatuwin o nimisən, mətə

3:1: Wək 18:27; 2 Kor 5:12 **3:2:** 1 Kor 9:2 * **3:3:** Nian Pol tatəghat e nəghatən “kəməsətə-pənən e kəpiel epin-epin,” tatəghat e Lou itəm Uhgın təmos-ipən kəm Moses, kən Moses təməte e kəpiel.

3:3: Eks 24:12; Jer 31:33; Esik 36:26-27 **3:4:** Wək 20:31

Narmin Rəha Uhgın tatos-ipa nəmegəhən.

Nəhag-əhagən rəha Nəniəkisən Wi Rəha Nasituən

⁷ Otətəlig-in-tu. Nian Uhgın təməte Lou e kəpiel, mos-ipən kəm Moses, nəhag-əhagən əh-ikin rəha Uhgın, kən nəhag-əhagən əh təmalpin niğanəmti Moses, kən netəm Isrel okol kəsotəplanən niğanəmtin, nat əpnarın nəhag-əhagən tinateiuaiu. Kən okəmə wək rəha Lou in suatip itəm tatuwin o nimisən, məto in təhag-əhag,

⁸ kən wək rəha Narmin Rəha Uhgın otəhag-əhag pik.

⁹ ! Okəmə wək itəm kəmakil netənim məmə otəkəike motimis, in tatəhag-əhag, kən wək itəm tatol netənim kotəuatip e niğanəmti Uhgın, in tatəhag-əhag pik agin!

¹⁰ Nipahrienən, nəniəkisin oas rəha nasituən itəm təməhag-əhag aupən, roiu in təsəhag-əhagən, məto-inu nəniəkisin wi itəm təhag-əhag pik agin, tinaprəkis-in itəm aupən.

¹¹ ! Kən okəmə wək rəha Lou itəm otəpanikə, tinuwa e nəhag-əhagən, kən wək rəha Narmin Rəha Uhgın itəm otatig lilin, tatəhag-əhag pik agin-əh!

¹² Tol nəhlan, məto-inu emotələhəu-pən əskasik rəhatimat nətəligən e wək əh rəha Narmin Rəha Uhgın, nətəligən rəhatimat təskasik e Uhgın, kən məsotəginən o nən-iarəpən rəhan nəghatən.

¹³ Itimat esotahmenən e Moses, itəm təmətəlpin niğanəmtin e niməhan agege məmə netəm Isrel

3:6: Jer 31:31; Jon 6:63; 1 Kor 11:25
27:26; Rom 1:17

3:11: Luk 22:31

3:7: Eks 34:29

3:9: Dut

3:12: Wək 14:27; 1 Kor 16:9

okəsotəplanən məmə nəhag-əhagən teiuaiu muwın mikə.

¹⁴ Məto Uhgın təmol nətəligən rəhalat tiəkis. Kən mətoarus-pa əh-roiu, nıməhan əh tətəhtosig-in nətəligən rəhalat nian kotafin Naoa Rəha Nəniəkisən Oas.† Uhgın təsos-irəkisən əh nıməhan əh, məto-inu tatos-irəkis əm e Kristo.

¹⁵ Əwəh, mətoarus-pa əh-roiu ne, nian kotafin Lou rəha Moses, nıməhan kit tatəfətain nikilat.

¹⁶ Məto okəmə etənim pah təuhlin mətag-pən o İərəməərə, nıməhan əh otiet rəkis.

¹⁷ Otətəlig-in-tu, İərəməərə əh, in Narmin. Kən ikin Narmin rəha İərəməərə tətətig ikin, in tatikis kitat.

¹⁸ Kən kitat, itəm kəsəfətainən niganəmtitə e nıməhan, koatəplan nəhag-əhagən asol rəha İərəməərə, kən netənim koatəplan nəhag-əhagən əh e nəmegəhən rəhatat. Kən in tatəuhlin nəmegəhən rəhatat məmə okotuwa kahmen lan e nəhag-əhagən itəm rəhan nəsanənən tatər tatər. Kən nəhag-əhagən əh təmisi-pən o İərəməərə itəm in Narmin Rəha Uhgın.

4

Nat keike e kípəhau oas

¹ Tol nəhlan, nikitimat təsəpouən o wək u məto-inu itimat emotos e nasəkitunən rəha Uhgın.

² Məto e nolən rəhatimat esotegəhan-inən nolən itəm tatəhluaig ne nolən aulis mın. Ko esoteiuəən məsotəuhlinən nəghatən rəha Uhgın. !Kəp! Məto itimat ioatən ətuatip əm nıpahrienən, kən e nolən

3:13: Eks 34:33 † **3:14:** “Naoa Rəha Nəniəkisən Oas” in “Oltəsteman.” **3:16:** Eks 34:34 **3:17:** Jon 8:36; Rom 8:2

əh, e niġanəmti Uhg̃in, emotol-arəp e niġanəmti netəmim rafin məmə rəhatimat nolən in tətuatip.

³ Kən okəm-naka namnusən təwir itəm ekoatən-iarəp in tatəhluaig o netəmim neen, məto kəp, tatəhluaig əm o netəmim itəm koatətəu-pən suatip o nuwinən e niġəm asol.

⁴ Koatətəu-pən suatip əh məto-inu Setan, u in lərmis itəm tatərəməərə e nətueintən u, təməfətain nətəliġən rəhalat, məmə kəsotəplanən nəhag-əhagən wir rəha namnusən təwir itəm tatuəp mətasiġəp̃in ilat. Nəhag-əhagən əh təmisi-pən e Kristo. Kən nian kitat koatəplan Kristo, kən kitat koatəplan məmə Uhg̃in in tahro nulan.

⁵ Itimat esotən-iarəp atipən itimat, məto ioatən-iarəp Iesu Kristo məmə in lərəməərə, kən itimat iolwək min rəhatəmat o nərg̃i Iesu.

⁶ Tol nəhlan məto-inu Uhg̃in u təmən məmə, “Pəs nəhag-əhagən tuəp masiġəp̃in ikin tapinəp ikin,” in təmasiġəp̃in e nikitat məmə kitat kotitun nehman nəsanənən, ne nepətən əhag-əhag rəha Uhg̃in, kən kitat koatehm natimnat min əh e niġanəmti Kristo.

⁷ Məto kitat koatos nat keike əh e kipəhau oas, inu niṗətitat. Tol nəhlan məmə otəgətun məmə nəsanənən wir əh taprəkis, təmisi-pən e Uhg̃in, təsisi-pamən otat.

⁸ Nəratən tepət koatiləs pikən itimat e suatip min rafin, məto təsərəkinən itimat. Nian neen ekotəruru suatip, məto esotapəsən nalkutən.

⁹ Netəmim koatol nəratən kəm itimat, məto

4:2: 2 Kor 2:17; 1 Tes 2:5
Jen 1:3; Aes 9:2; 2 Kor 3:18

4:4: Efes 2:2; Kol 1:15; Hip 1:3

4:7: 2 Kor 5:1

4:6:

4:8: 2 Kor 1:8; 7:5

Uhgîn t̄sap̄s̄ən it̄imat. Koatoh it̄imat, m̄əto k̄əsot̄ər̄ak̄in̄ən it̄imat.

¹⁰ İkin p̄əhr̄uən ioatuw̄in ik̄in, katohamnu n̄ip̄ət̄it̄imat tahmen e k̄əmohamnu İesu. Tol n̄əhlan m̄əm̄ə, net̄ənim̄ okot̄əplan n̄əmeḡəh̄ən r̄əha İesu e n̄ip̄ət̄itat.

¹¹ K̄ən it̄imat it̄əm ekoat̄əmeḡəh, n̄ian rafin kat̄eḡəhan-in it̄imat m̄əm̄ə ekot̄im̄is o n̄ərḡi İesu. Tol n̄əhlan m̄əm̄ə net̄ənim̄ okot̄əplan r̄əhan n̄əmeḡəh̄ən e n̄ip̄ət̄itat it̄əm ot̄əpanim̄is n̄ian kit̄.

¹² K̄ənu, n̄ian rafin it̄imat ioat̄il̄əs p̄ik̄ən n̄im̄is̄ən m̄əm̄ə it̄əmat on̄əkot̄it̄un n̄əmeḡəh̄ən it̄ul̄in.

¹³ Naoa R̄əha Uhḡin tat̄ən m̄əm̄ə, “Emahat̄ət̄ə, k̄ən tol n̄əhlan ekat̄ən.” K̄ən e nol̄ən kit̄iəh̄ əm̄ r̄əha nahat̄ət̄əən, it̄imat m̄in ekotahat̄ət̄ə, k̄ən tol n̄əhlan ekoat̄ən,

¹⁴ m̄əto-inu it̄imat ekot̄it̄un m̄əm̄ə, et̄əm t̄əmol İər̄əm̄ər̄ə İesu t̄əmeḡəh m̄in e n̄im̄is̄ən, in otol it̄imat ne it̄əmat, kitat rafin kot̄əmeḡəh m̄in e n̄im̄is̄ən kitat İesu, k̄ən m̄əf-iar̄əp̄ kitat e n̄igan̄əmt̄in.

¹⁵ Nat̄im̄nat rafin u o n̄əw̄ir̄ən r̄əhat̄əmat, k̄ən n̄ian n̄əw̄ir̄ən r̄əha Uhḡin tatiuw̄-pa net̄ənim̄ t̄ep̄ət t̄əhm̄in m̄in okotuwa o Kristo, k̄ən okotos-ip̄ən n̄ənwiw̄iən t̄ep̄ət k̄əm Uhḡin, k̄ən okot̄il̄əs-ip̄ər̄ n̄ərḡin ilis ilis aḡin.

¹⁶ Tol n̄əhlan, n̄ikit̄imat t̄əsəp̄oūən. Nat̄ əpn̄ap̄in m̄əm̄ə n̄ip̄ət̄itat tateiuaiu roiu, m̄əto Uhḡin tatol n̄ikit̄imat tatuwiwi n̄ian rafin.

¹⁷ Tol n̄əhlan m̄əto-inu, n̄ərat̄ən it̄əm koatatiḡ lan, ilat nat̄ əpn̄ap̄in əm̄, k̄əsot̄atiḡən tuw̄əh. M̄əto

noalat in nəhag-əhagən wir itəm otətətig lilin, kən in təwir məfiğəm taprəkis-in ilat.

¹⁸ Kən tol nəhlan, niğanəmtitə kəsotətulən e nat itəm katəplan, məto koatətul e nat itəm kəsəplanən, məto-inu nat itəm katəplan in nat rəha roiu əm, otəpanikə, məto nat itəm kəsəplanən in namnun tikə.

5

Nipət'in wi əpəh e nego e neai

¹ Tol nəhlan, kotitun məmə nipətətat in tahmen e nimə tapolən itəm kitat kotatig lan ikin-u e nətueintən, kən nian kit otəmnəm it mərat. Kən nian nimə tapolən əh tikə e nətueintən, məto əpəh e nego e neai, rəhatat nimə wi əh-ikin itəm sənəmə etənim təmol, məto Uhg'in əm təmol, nipətətat wi itəm otətig lilin.

² Məto roiu e nipətətat rəha nətueintən, koatəhg nikitə, kən kotolkeike pik məmə nian otatuwa itəm kitat okotuwin e nipətətat wi rəha nego e neai, tahmen e kitat koatuwin e natimnat wi.

³ Tol nəhlan məto-inu sənəmə kitat okotuwa narmin əm nipət'in tikə, məto okotos nipət'in wi rəha nego e neai.

⁴ Nipətətat itəm otimis tol kitat koatekimis moatehag rəha nəpouən, məto sənəmə koatolkeike məmə okotimis kən nipətətat otikə, kəp. Məto kitat kotolkeike məmə okotuwin e nipətətat wi məmə nəmegəhən lilin otəwiək nipətətat rəha nətueintən itəm otimis.

⁵ Kæn Uhgîn pîsîn æm tæmol kitat o natimnat min æh, kæn tæmos-ipa Narmîn Ræhan mæmæ otægætun wîr kæm kitat mæmæ ræhan næniækisæn min otuwa pahrien.

⁶ Kæn tol næhlan, nætæligæn ræhatat tæskasik, kæn kitat kotitun wîr mæmæ nian koatos æm nîpætîn ræha nætueintæn u, kitat koatætul æh ihluæ imæ Iæræmære ikîn ræhatat.

⁷ Kitat kotatig e nætueintæn e nahatætææn e Uhgîn, sænæmæ e natimnat itæm koatæplan.

⁸ Iatæn mæmæ nætæligæn ræhatat tæskasik, kæn kotolkeike mæmæ kotapæs nîpætîtat motuwîn e nimæ wi ræhatat kitat Iæræmære.

⁹ Tol næhlan, okæmæ kotatig e nîpætîtat, o okæmæ kotapæs nîpætîtat ræha nætueintæn, kitat kotalkut pîk mæmæ kotol natimnat itæm koatol nîki Iæræmære tagien.

¹⁰ Kotol næhlan mæto-inu kitat rafin okotækæike motætul aupæn e Kristo mæmæ in otakil ræhatat nolæn min, kæn kitat kitîæh kitîæh okotos nætouæn tætu-pæn natimnat itæm kæmotol e nætueintæn, okæmæ nat tæwîr o nat tærat.

Ien æhrûin min ræha Uhgîn

¹¹ Kæn roiu æh, mæto-inu ekotisiai-in Iæræmære, kæn motalkut mæmæ ekotiûw-pa netæmim. Uhgîn titun itimat ne wæk ræhatimat, kæn ekotolkeike mæmæ itæmat min onækotitun wîr itimat.

¹² Esotolkeikeæn mæmæ ekotilæs-ipær itimat e nîganæmtitæmat, mæto ekotos-ipînæ ræhatimat nætæligæn mæmæ okæm-naka nîkitæmat otagien otimat. Kæn roiu, nækotitun nuhalpînæn næghatæn ræha netæmim itæm kotsausit o nolæn itæm netæmim

5:6: Hip 11:13-16

5:8: Fil 1:23

5:9: Kol 1:10; 1 Tes 4:1

5:10: Pri 12:14

koatəplan, məto nıkilat təsəhtən nat itəm tətatiğ e nıki etəmim.

¹³ Okəmə itimat ialməl mın, məto o nərgi Uhgın. Kən okəmə rəhatimat nətəliğən tətuatip əm, in nat kit itəm otasitu etəmat.

¹⁴ Tol nəhlan məto-inu, nolkeikeən rəha Kristo tatərəmərə etimat, məto-inu itimat ekotıtun wır məmə suah kitiaħ əm təmimıs o netəmim rafın, kən tol nəhlan, netəmim rafın kınotımıs.

¹⁵ Kən təmimıs o netəmim rafın məmə ilat itəm koatəmegəħ, okotapəs nolən natımnat itəm ilat əm kotalkeike, məto ilat kotəkəike motol nolən mın itəm İesu tolkeike, u etəm təmimıs olat kən məmegəħ mın e nımısən.

¹⁶ Tol nəhlan, roiu ne, itimat esotakilən netəmim e nolən itəm netəmim rəha nətueintən kotakil netəmim lan. Nat əpnapın nian kit emotakil Kristo e nolən əħ, məto roiu esotolən.

¹⁷ Tol nəhlan, okəmə suah kit təmuwa kitiaħ ilau Kristo, in təmuwa etəmim wi. !Nat oas təmıkə, kən nat wi tınuwa!

¹⁸ Natımnat rafın mın əħ tətisi-pən e Uhgın. Aupən kitat tıkimır mın kitat Uhgın, məto e Kristo, in təməmık kitat kotuwa iuəhkır ron, mol kitat iolin mın. Kən təmos-ıpa kəm itimat wək u rəha niuw-pamən tıkimır mın rəha Uhgın okotuwa iolin mın.

¹⁹ Inu tatən məmə Uhgın təmiuw-pa rəhan tıkimır mın e nətueintən məmə okotuwa iolin mın e Kristo, kən məsafın mınən rəhalat nolən rat mın. Kən təmos-ıpa kəm itimat nəğhatən u rəha niuw-pamən tıkimır mın rəhan okotuwa iolin mın.

5:14: Hip 5:9

5:15: Rom 14:7-8

5:17: Rom 8:1; Kal 6:15

5:18: Rom 5:10

5:19: Rom 3:23-25

²⁰ Tol nəhlan, itimat ien əhruin mın rəha Kristo, kən tahmen məmə Uhgın tətəun-in netəmim e nəwiatimat. Kən ioatətapəh əskasik otəmat e nərgi Kristo məmə: nakotapəs nolə tikişir, kən motuwa ioli Uhgın mın.

²¹ Uhgın təmol suah u itəm rəhan nolən rat tika, məmə in sakrifais rəha nolən rat mın rəhatat, məmə e in, kitat okotətuatip e niganəmti Uhgın.

6

¹ Məto-inu itimat ioatol wək kitiəh itimat Uhgın, ekotətapəh əskasik otəmat məmə nian Uhgın tətawte-in rəhan nəwırən kəm itəmat, nəsosən tahmen in nat əpnapın əm,

² məto-inu Uhgın tatən məmə,

“E nian ətuatip, eməto ik,

kən e nian rəha nosmegəhən, emasitu lam.”

Iakən kəm itəmat, məmə roiu, in nian ətuatip rəha Uhgın, roiu in nian rəha nosmegəhən.

Nian əskasik mın e nəmegəhən rəha Pol

³ Esotolən nat kit itəm suah kit otəme lan e rəhan nahatətəən, məto-inu esotolkeikeən məmə okəsən ratən wək rəhatimat.

⁴ Məto nolən mın rafin e nəmegəhən rəhatimat koatəgətun məmə itimat iolwək mın pahrien rəha Uhgın: itimat ekotətul əskasik e nian rəha nəratən, ne nian iəkis mın, ne nian itimat ekotəto tərət.

⁵ Netəmim kəmotoh itimat, kən kəmki-pən itimat e kalapus, kən katitəp itimat məmə okoh itimat. Emotol pik wək, məsotapılən lapın, kən nəumis tus itimat.

⁶ Esotolən nolən kit itəm tatol nikitimat tamkimik, itimat ekotenatig, nətəligən rəhatimat kaifəmäh, ekotol təwir kəm netəmim, Narmın Rəha Uhgın tatər e nikitimat, kən ekotolkeike netəmim e nolkeikeən pahrien.

⁷ Ekoatən əm nıpahrienən, kən nəsanənən rəha Uhgın tətətig etimat. Rəhatimat nolən ətuatıp in tahmen e natımnat rəha nəluaginən o nohən ne nətlosigən.

⁸ Netəmim neen koatısiai-in itimat, neen koatehm-əhau itimat, neen koatən rat itimat, neen koatən wir itimat, neen koatən məmə itimat ekoateiuə məmə itimat iolwək mın rəha Uhgın, məto itimat iolwək mın pahrien rəhan.

⁹ Netəmim neen kəsotegəhan-inən məmə itimat aposol mın pahrien, məto netəmim tepət koatən məmə itimat aposol mın pahrien. Nian rafin nımısən tatıtəp itimat, məto ekoatəmegəh əh. Katoh itimat, məto kəsohamnuən əh itimat.

¹⁰ Nikitimat təpou, məto nian rafin ekotagien əh. Rəhatimat nautə tikə, məto itimat ekotol netəmim tepət rəhalat nautə tepət. Rəhatimat nat kit tikə, məto ekoatos natımnat rafin.

¹¹ Piak mın əpəh Korin, emotən rafin nəghatən kəm itəmat kəsapəsən kit, kən ekotolkeike itəmat e nikitimat rafin.

¹² Itimat esotahtosig-inən nolkeikeən rəhatimat otəmat, məto itəmat notahtosig-in rəhatəmat otimat.

¹³ Roiu əh, iatəghat kəm itəmat məmə itəmat nenətik ətuatıp. Tətuatıp əm məmə itəmat mın, nakotolkeike itimat e nikitəmat rafin.

14 Sotənən kəm netəm kəsotəfakən məmə nəkoatol wək kit itəmat min ilat. ?Nolən ətuatip ne nolən tərət kiatur nol kələhən nat kit? ?O, nəhag-əhagən ne napinəpən kiatur nuwamən məpələh kələh muəghat? !Kəp!

15 Kən e nolən kitiəh əm, Kristo ne Setan, okol kəsuanən nəghatən kitiəh nian kit. ?İəfak ne etəm təsəfakən kiatur nolən nat e nətəligən kitiəh? !Kəp!

16 E Nimə Rəha Uhgın, ikin kit tikə əh-ikin o narmi nat min, məto-inu kitat u Nimə Rəha Uhgın itəm tatəmegəh. Kən Uhgın təmən məmə,
“Ekatig itimat min ilat,
kən maliwək itimat min ilat,
kən ekuwa io Uhgın rəhalat,
kən ilat okotuwa rəhak netəmin.”

17 Kən İərəməərə təmən məmə,
“Tol nəhlan, otiet rəkis elat, motan isəu olat.
Kən məsotekən nat itəm tamkimik e niğanəmti
Uhgın,
kən nikik tagien məmə ekos itəmat.”

18 “Kən ekuwa rəhatəmat tata,
kən itəmat onəkotuwa nenətik min,”
inu nəghatən rəha İərəməərə itəm in ilis agın.

7

1 İolik min. Nəniəkisən min u rəhatat. Kən tol nəhlan, pəs kotafəl nikitat, motos-irəkis natimnat rafin itəm koatol nipətitat ne narmitat kotamkimik. Kən pəs kotələhəu kalın kitat məmə rəha Uhgın əm motətəu-pən rafin suatip itəm nikin otagian lan.

6:14: Efes 5:11 **6:16:** Lev 26:12; Esik 37:27; 1 Kor 3:16 **6:17:** Aes 52:11; Esik 20:34,41; Nol Əpən 18:4 **6:18:** 2 Saml 7:14; 7:8; Jer 31:9

Niki Pol t̄magien olat

² Oterāh e nikitāmat kām itimat. Esotolān t̄rat kām suah kit, esotiuw-p̄nān suah kit t̄rat ikīn, esotalkutān māmā ekotos nat kit r̄hatāmat e nolān eko-eko.

³ Esānān n̄ghatān u m̄to-inu n̄motol nolān rat. Emān r̄kīs kām itāmat māmā ekotolkeike pik itāmat nian rafin, k̄n nat āpnāpīn nīmīsān o n̄wīrān otuwa e n̄megāhān r̄hatīmat, m̄to itāmat āp̄h imā e nikitīmat.

⁴ Io etahat̄tā āskasīk etāmat. Iatausit otāmat. Itāmat n̄motilās-ip̄r pik r̄hak n̄t̄līgān. Emos n̄ratān t̄p̄t t̄muwa e r̄hak n̄megāhān, m̄to n̄kik tagien mapr̄kīs otāmat.

⁵ Tol n̄hlan m̄to-inu, nian emotuwa Masetonia, esotamegān, m̄to nian rafin, n̄ratān tatilās itimat t̄mīsī-p̄n ikīn p̄sīn p̄sīn mīn. E n̄megāhān r̄hatīmat, netāmim k̄motāmou motol n̄ratān kām itimat, k̄n itimat ekoat̄gīn.

⁶ M̄to Uhgīn tatol kepīn netāmim itām n̄t̄līgān r̄halat t̄p̄ou, k̄n t̄mol kepīn itimat e nuwamān r̄ha Taetas.

⁷ K̄n s̄nāmā e nuwamān ām r̄han itām t̄mol n̄kitīmat tagien, m̄to e n̄ghatān wīr r̄ha nol kepīnān itām n̄motān-ip̄n kām in. In t̄mān-ip̄a kām itimat māmā itāmat nakotolkeike pik māmā nakot̄plan io, k̄n t̄mān māmā nikitāmat tat̄to t̄rat o n̄ghatān r̄hak, k̄n t̄mān māmā nakolkeike pik io moat̄tul āskasīk o n̄rgāk. Nian em̄to, nagienān e n̄kik t̄m̄r m̄arioah.

⁸ Nat āpnāpīn okāmā r̄hak naoa aup̄n t̄mol itāmat nakot̄to t̄rat, m̄to es̄toān t̄rat ron. M̄to aup̄n, em̄to t̄rat ron, m̄to-inu em̄plan māmā

naoa u tæmol itæmat nakotæto tærat, mæto ræha nian ækuækir æm.

⁹ Mæto roiu, nîkik tagien, kæn sænæmæ mæmæ næmotæto tærat, kæp. Nîkik tagien mæmæ nian næmotæto tærat, næmotæuhlin itæmat e ræhatæmat nolæn rat min. Nîpahrienæn, Uhgîn tolkeike mæmæ kitat okotæto tærat o nolæn tol min-nulan. Kæn mæto-inu næmotæuhlin itæmat, kæn natimnat itæm emotæn aupæn kæm itæmat tæmæsolæn mæmæ næmotakiæh e ræhatæmat nahatætææn.

¹⁰ Kæn nian koatæto tærat e nolæn itæm Uhgîn tolkeike, kæn kotæuhlin kitat e ræhatat nolæn rat, kæn Uhgîn tatosmegæh kitat. Kæn nîkitat otæsæpouæn o nolæn æh. Mæto nian koatæto tærat e nolæn ræha nætueintæn, tatiuw-pæn kitat e nîmisæn.

¹¹ Otæplan-tu næmegæhæn ræhatæmat nian næmotæto tærat e nolæn itæm Uhgîn tolkeike. Nolæn æh, noan tepæt: nakotolkeike motalkut æskasik mæmæ nækotol nolæn ætuatip, kæn motoalkut æskasik mæmæ nokotæg-ætuatip-in ræhatæmat nolæn rat min, kæn motetæhau nolæn rat min, kæn narmitæmat tæmiwig næmotaut motægîn nolæn rat min. Næmotolkeike mæmæ nækotæplan min io, kæn nakotolkeike pik mæmæ nakotætul æskasik o nærgæk. Kæn næmoatætul matip mæmæ nækotol nalpinæn kæm netæm kotol nolæn rat. E nolæn min rafin ræhatæmat, næmotægætun mæmæ næsotolæn nat kit tærat e natimnat u.

¹² Kæn emæte naoa u kæm itæmat, mæto esæteæn o suah u itæm tæmol nolæn rat, kæn esæteæn o suah u itæm in tæmærakîn. Kæp. Emæte ilæ mæmæ itæmat onækotæplan æsas e nîganæmti Uhgîn mæmæ nækoatætul æskasik o nærgitæmat.

¹³ Natimnat rafin min əh koatıləs-ipər nətəligən rəhatimat.

Sənəmə itimat əm itəm nəmoatıləs-ipər nətəligən, məto nikitimat tagien pik o Taetas, məto-inu nikin tagien məmə nəmoatıləs-ipər min nətəligən rəhan.

¹⁴ Emən-ipən kəm in məmə etausit pik otəmat, kən itəmat nəməsotolən io ekaulis. Natimnat rafin itəm emotən kəm itəmat, ilat nıpahrienən. Kən e nolən kitiah əm, natimnat rafin itəm emotən kəm Taetas etəmat, kən motausit ron, ilat min nıpahrienən.

¹⁵ Taetas, nikin tatəht əh məmə itəmat rafin ağin-əh nəmotol nəwian, kən moatəğın moatasıəp nian nəmotegəhan-in məmə otuwa məplan itəmat. Kən nian nikin tatəht natimnat min əh, nolkeikeən rəhan otəmat tatər təhmın min.

¹⁶ Nikik tagien pik məto-inu etahətətə əskasik etəmat məmə nəkoatol naka itəm tətuatıp.

8

Pol təmətəpəh məmə okotawte

¹ Piak min ne winik min, ekotolkeike məmə nəkotıtun nəwırən rəha Uhgın itəm təmawte-in kəm niməfak min əpəh Masetonia məmə ilat kotıtun nasituən e netəmim neen min.

² İlat kəmotatig e nəratən asol kit ne nian əskasik min, kən nat ənnapın ilat nan rat rəhalat nautə tikə ağin, məto nəmegəhən rəhalat tərıoah wır e nagienən. Kən nan ratən ne nagienən kəmuoe-in nolən təwır. E nolən əh, kəmotərakin məni tepət motos-ipən kəm iəfak min əpəh ikın min.

³ Iatən-iarəp kəm itəmat məmə ilat kəmotos-ipən tepət, taprəkis-in itəm netənim nīkilat təht məmə okol kəsotolən. Kən ilat atip kəmotol.

⁴ Kəmotətapəh amul otimat məmə itimat ekotegəhan pəs ilat kotasitu e wək rəha nos-ipən məni kəm iəfak mīn əpəh Jerusalem.

⁵ Kəmotəupən kos-ipən nəmegəhan rəhalat kəm Iərəməərə, kən uarisig, kəm itimat, e nolən itəm Uhgīn tolkeike. Nīkitimat təsəhtən məmə okotol tepət nəhlan, məto kəmotol.

⁶ Kən tol nəhlan, emotuəh nīki Taetas məmə otitəlig-pinə otəmat. In təmaupən məghat kəm itəmat o nolən nat u, kən tol nəhlan, emotətapəh məmə in otəghat kəm itəmat məmə nəkotol nām-nūn wək wīr rəha nawteən əh itəm nəmotətuoun.

⁷ E natimnat mīn u rafīn, itəmat nəmotol təwīr pīk maprəkis, inu nahatətəən rəhatəmat, ne nəghatən rəhatəmat, ne nītunən rəhatəmat, ne nolən rəha nətul əskasikən, ne nolkeikeən rəhatəmat otimat. Kən roiu, iakolkeike məmə nəkotol wək kit mīn e nolən təwīr pīk maprəkis, inu wək wīr rəha nawteən.

⁸ Esənən məmə nəkotəkəike motol. Məto emotəgətun kəm itəmat məmə netəm pīsīn pīsīn mīn nīkilat tagien o nasituən e wək əh. Kən roiu əh, iakolkeike məmə ekisīlu wīr məmə nolkeikeən rəhatəmat in nīpahrienən tahmen elat, o kəp.

⁹ Itəmat nəkotitun wīr nəwīrən rəha Iərəməərə Iesu Kristo itəm təmawte-in kəm itəmat, məmə nat əpnəpīn rəhan nautə tepət, məto təmol otəmat məmə in rəhan nautə tīkə. Kən məto-inu təmol məmə rəhan nautə tīkə, kən mol itəmat rəhatəmat nautə tepət.

¹⁰ Kæn inu ræhak nætəligən e natimnat min u, itəm otasitu etəmat. Otol namnun e wək itəm nəmotətuoun e nup uarisig. Nikitəmat təmaupən məht məmə nəkotol wək əh, kæn itəmat nəmotəupən motətuoun motol.

¹¹ Tol nəhlan, roiu otol namnun wək u rəha nos-ipənən. Kæn rəhatəmat nətəligən o nolən wək u itəm nakotolkeike pik məmə nəkotol, in otuwa nıpahrienən, kæn itəmat onəkotol e rəhatəmat atıp natimnat.

¹² Okəmə nikitəmat tagien o nos-ipənən, kæn Uhgın nıkin tagien o nosən natimnat əm itəm nakoatos moatos-ipən. Kæn in təsətapəh-inən natimnat itəm tikə otəmat.

¹³ Esotolkeikeən məmə nəmegəhən rəha netəmim neen otimətig məto-inu kəmos rəhatəmat məni, məto nəmegəhən rəhatəmat in otiəkis məto-inu nəmotasitu elat. Kəp. İakolkeike məmə təhmen-ahmen əm otəmat rafın.

¹⁴ Roiu, itəmat nakoatos tepət kæn motitun nasituən elat. Kæn o nian min neen, ilat kotitun noorən kəm itəmat okəmə rəhatəmat tikə. Kæn itəmat nakotahmen-ahmen əm,

¹⁵ təhmen e itəm Naoa Rəha Uhgın tatən məmə, “Netəmim itəm kəmotəulək tepət, təhmen əm, təsaprəkisən.

Kæn netəmim itəm kəmotəulək noan-məsin, rəhan nagwənən təhmen əm, təsikəən.”

Taetas təmuwin Korin

¹⁶ İatənwiwi Uhgın məmə təmələhəu-pən e niki Taetas nətəligən o nasituən etəmat, təhmen-ahmen e rəhak.

17 Tol nəhlan məto-inu Taetas, nikin tagien o nımnəən məplan itəmat təhmen e itəm emən kəm in. Kən taprəkis-in itəm əh, nikin tagien pı̄k o nasituən etəmat, kən in rəhan əm nətəligən məmə in otımnə məplan itəmat.

18 Kən itı̄mat ekotahl-ipınə mın piətət kit mın tı̄mnə ilau mın. Suah u, netəm e niməfak mın koatısiai-in o rəhan wək o nən-iarəpən namnusən təwır.

19 Kən taprəkis-in inu, niməfak mın kəmotitəpun məmə otuwa itı̄mat mın o nıləsən məni u muwın əpəh. Kən itı̄mat ekotərəməərə lan o noorən məmə otıləs-ipər nərği İərəməərə, kən matəgətun məmə nıkitı̄mat otagien pı̄k o nasituən.

20 Itı̄mat esotolkeikeən məmə suah kit otən rat itı̄mat o nolən rəha noorən məni asol əh.

21 Tol nəhlan, itı̄mat ekotalkut pı̄k məmə ekotol nat itəm tətuatıp, məto sənəmə e nıganəmti İərəməərə əm, məto e nıganəmti netəmim mın.

22 Kən ekotahl-ipınə piətət kit mın iləhal suah mil u. Suah əh, e wək tətət ne nolən tətət, emotısılı wır məmə in tolkeike pı̄k məmə otasitu. Kən roiu, in tolkeike pı̄k məmə otasitu məto-inu in tətəhatətə pı̄k etəmat.

23 Kən o Taetas, itı̄mlau mın ekioal wək kitiəh əm, kən in mın tatol wək e nıkitəmat o nasituən etəmat. Kən o piətət mın, ilat ien əhruin rəha niməfak mın, kən nolən wır mın e nəmegəhən rəhalat koatısiai-in Kristo.

24 Tol nəhlan, otol rəhatəmat nolən kəm suah miləhal əh məmə nakotolkeike pəhrien iləhal, kən iləhal okəhalıtun o nat naka itı̄mat ekotausit otəmat. Kən otol-wır kəm ilat məmə niməfak mın

okotəplan.

9

¹ Okəmə esəteən naoa u kəm itəmat, in təwir əm məto-inu nəkotitun rəkis wək u rəha nasituən e iəfak min əpəh Jerusalem.

² İatən nəhlan məto-inu io ekıtun məmə nəkotolkeike məmə onəkotasitu. Kən ematiləs-ipər nolən wir rəhatəmat o netəm Masetonia, matən kəm ilat məmə e nup itəm tınuwın rəkis, itəmat əpəh Akaea, nəmoatətul matıp o nos-ipənən. Kən nian kəmotəplan məmə nikitəmat tagien pık o nasituən, təmol min ilat tepət kotolkeike məmə okot-asitu min.

³ Məto roiu, etahl-ipinə piətət miləhal u məmə iləhal okəhaləplan itəmat məmə itəmat onəkotol nat itəm nəmotən, təhmen əm məmə emən mihin, kən tol nəhlan rəhatimat nəghatən o niləs-ipərən nolən wir rəhatəmat, sənəmə nat əpnapın əm.

⁴ Məto okəmə nəsotolən, kən nian ekımnə itimat netəm Masetonia neen, kən okotəplan məmə itəmat nəsotolən əh, kən nolən əh otol itimat ekotaulis, məto-inu itimat enoatiləs-ipər rəkis itəmat. Kən otol itəmat nakotaulis taprəkis.

⁵ Tol nəhlan, nıkik təht məmə ekəkəike mətapəh o piətət miləhal məmə okotımnə rəkis pitən kəplan itəmat, kən motol namnun wək o nəmki-pamən məni asol itəm nəmotən-ıəkis məmə nakotos-ipən. Məto iakolkeike məmə in nos-ipənən kit itəm tatisipən atıp e nikitəmat, sənəmə suah kit tatəkəike kəm itəmat məmə nakotos-ipən.

Nolən nawteən

⁶ Sotaluinən nat u. Etəm tatəfe noan məsɪn, matəulək-in noan məsɪn. Kən etəm tatəfe tepət, matəulək-in tepət.

⁷ Itəmat kitiəh kitiəh nakəkəike mos-ipən nat naka nəmən e nɪkim məmə nakos-ipən. Okəmə nɪkim təsagienən ron, təsəwɪrən məmə nakos-ipən. Kən okəmə nakos-ipən məto-inu suah kit tatəkəike kəm ik məmə nakos-ipən, in mɪn təsəwɪrən. Ekən nəhlan məto-inu Uhgɪn tolkeike etəm u tatos-ipən e nɪkin pahrien.

⁸ Kən Uhgɪn tɪtun nawte-inən nəwɪrən rafin agɪn kəm itəmat məmə e nian rafin e natɪmnat rafin, nakotos natɪmnat rafin itəm tətuatɪp məmə nəkotəkəike motos, kən moatos tepət mɪn əh-ikɪn məmə nakotoor kəm netəmim.

⁹ Naoa Rəha Uhgɪn tatən məmə,
 “In tatoor rəhan natɪmnat tepət kəm ian-rat mɪn, kən rəhan nolən ətuatɪp tətatɪg lilin.”

¹⁰ Kən Uhgɪn itəm tatos-ipən nɪkuti nat o etəm tatəfe, kən matos-ipɪnə pɪret o nunən, e suatɪp kitiəh əm in otos-ipɪnə nat tepət kəm itəmat mɔl in tepət mɪn məmə, itəmat nəkotɪtun nasituən e netəmim neen mɪn, kən in otol noan tepət itəm təmisi-pən e nolən ətuatɪp rəhatəmat.

¹¹ E natɪmnat rafin e nəmegəhən rəhatəmat, Uhgɪn otos-ipən rəhan nəwɪrən kəm itəmat məmə itəmat nəkotɪtun nawteən e nian rafin. Kən nian ekotoor rəhatəmat nasituən, netəmim okotənwiwi Uhgɪn ron.

¹² Wək u itəm itəmat nəkotol, tatos-ipən məni o nagwənən kəm netəmim rəha Uhgɪn u nəumis

tatus ilat, mæto tatol nat wir kit min taprækis, inu nænwiwiæn itəm təmər mærioah e niki netəmim matuwīn o Uhgīn.

¹³ Nian nəkotol wək u, natol-arəp nolən rəhatəmat kəm netəmim tepət. Kən ilat okotiləs-ipər nərgi Uhgīn ron, mæto-inu itəmat nəkotol pahrien nolən rəha netəmim itəm koatən nīpahrienən e namnusən təwir rəha Kristo. Kən okotiləs-ipər nərgi Uhgīn o nawteən rəhatəmat e mæni asol kəm ilat ne netəmim rafin.

¹⁴ Kən nian koatəfak otəmat, nīkilat tuwīn otəmat mæto-inu Uhgīn təmawte-in rəhan nəwirən kəm itəmat taprækis agīn-əh məmə nəmotasitu pīk elat.

¹⁵ !Pəs kotən kəm Uhgīn məmə nīkitat tagien o Nətīn itəm təmos-īpa kəm kitat, u in nat təwir agīn maprækis!

10

Pol təmuhalpīn nəghatən e rəhan wək

¹ Io Pol, io atīp, iatəkəike e nat kit kəm itəmat. Netəmim neen koatən məmə nian kitat min itəmat, rəhak nətəligən in ləhau əm, mæto nian ekiet rækis etəmat, rəhak nolən təskasik pīk. Kristo, in rəhan nətəligən ləhau, kən in etəm mətīg. Kən e nolən kitīəh əm,

² iatətapəh otəmat məmə, onəkotol nolən rəhatəmat tətuatīp məmə nian ekimnə, məsəhai pīkən itəmat. Mæto ekītun məmə ekəhai netəmim neen u koatən məmə ekoatətəu-pən nolən rəha nətueintən u,

³ mæto-inu nat æpnapin ekotatig e nætueintæn u, itimat esotæluaginæn e nolæn ræha nætueintæn u.

⁴ Natimnat ræha næluaginæn itəm itimat ekoatæluagin lan, sənəmæ nat itəm nætueintæn koatæluagin lan. Kæp, natimnat ræhatimat, ilat koatos nəsənənæn ræha Uhgın o nərəkinæn ikin tiækis o nuwinæn ikin ima tikimir min.

⁵ Itimat ekoatərækin nəghatæn eiueiuə min ne nətəligən ausit min, ilat rafin itəm koatæn-iəhau netəmim o nitunæn Uhgın. Nətəligən min rafin itəm tikimir min ræha Uhgın, itimat ekoatæluagin elat, motol win elat, motol məmæ ilat rafin okotol nəwia Kristo.

⁶ Kæn nian itəmat nakotətəu-pæn wir nəwia Kristo, itimat ekoatətul matip o nolæn nalpinæn kəm netəmim rafin itəm koatəht nəwian.

⁷ Itəmat nakoatəplan nat itəm ihluə, mæto nəkotəruru nipətin. Okəmæ suah kit titun pahrien məmæ in etəmim ræha Kristo, kæn in otətəlig-in wir min məmæ itimat min ræha Kristo tahmen lan.

⁸ Nat æpnapin iatəghat ausit məsin o nepətæn itəm Iərəmərə təmos-ipa, okol esaulisən ron. Təmos-ipa o niləkinæn itəmat, sənəmæ o niləs-iəhauən itəmat.

⁹ Esolkeikeən məmæ nikitəmat təht məmæ ekəte naoa min kəm itəmat e nolæn itəm netəmim neen koatən, məmæ otol itəmat nakotəgin.

¹⁰ Ilat kotən rat io məmæ, “Rəhan naoa təfigəm kæn masilə, mæto nian tətən kitat min, in sənəmæ etəm əskasik kit, kæn rəhan nəghatæn in nat æpnapin əm.”

¹¹ Netəm tol nəhlan kotəkəike motitun məmæ, nolæn rəhatimat itəm koatəplan e naoa min

emotahl-ipən nian itimat isəu, məto nian ekotimnə, ekotol rafin nolən mın əh.

¹² Esotolkeikeən məmə ekotəplan ahmen itimat ne netəm pisin neen itəm koatiləs-ipər atip ilat. ! Kəsi, itimat esotahmenən! !Kəp, iatəsan əm! Nian ilat atip əm koatəplan ahmen ilat mın, kən koatakil atip əm ilat mın, tol rəhalat nitunən talməl.

¹³ Məto itimat, esotəghat ausitən taprəkis e nepətən rəhatimat, məto ekotəghat ausit e wək itəm Uhgın təmələhəu-pən məmə rəhatimat, kən wək u, itəmat mın əpəh ikin.

¹⁴ Kən nəghat ausitən e nepətən rəhatimat otəmat in ətuatip əm, in təsepət pikən. Okəmə esotuwamən otəmat, okol esotəghatən nəhlan. Məto nıpahrienən, emotaupən motuwa mətoaruspa itəmat nian emotan moatən-iarəp namnusən təwir rəha Kristo.

¹⁵ Netəmin neen koatəghat ausit o wək itəm suah pisin təmol. Məto itimat ekoatəghat ausit əm e wək itəm Uhgın təmələhəu-pən kəm itimat. Itimat emotələhəu-pən əskasik nətəligən rəhatimat məmə nahatətəən rəhatəmat otəwiə təhmın mın, kən tol nəhlan, rəhatimat wək e nikitəmat otol iahgin mepət,

¹⁶ kən tol nəhlan, ekotitun nuwinən motən-iarəp namnusən təwir e ikin mın e nikali imatəmat ikin muwin təhmın mın. Kən e nolən əh, itimat esotolən wək e ikin kit itəm suah kit tinol wək rəkis ikin, kən məsotəghat ausitən o wək rəha etəm pisin.

¹⁷ Məto Naoa Rəha Uhgın tatən məmə, “Pəs etəm tatəghat ausit, in otəghat ausit əm e natimnat itəm İərəməərə təmol.”

¹⁸ Iatən nəhlan məto-inu, kəsisiyai-inən etəmim itəm tatiləs-ipər atip in, məto katisiyai-in əm etəmim itəm İərəmərə tatiləs-ipər.

11

Pol ne aposol eiueiuə mın

¹ İakolkeike məmə nakotegəhan-in io pəs ekən rəhak məsin nalmələn kəm itəmat. Məto pahrien, noatol rəkis.

² İatehm wır itəmat, məsolkeikeən məmə suah kit mın otəmki-rəkis itəmat e nelmək, kən nolən əh rəhak təmişipən əm o Uhgın. Io tata rəhatəmat, kən itəmat nəkotahmen e pətan əkəku wi kit itəm kınən rəkis məmə okos rəham kətim kan məmə otətəu-pən suah kitiəh əm, nərgin u Kristo. Kən iatehm wır rəhak pətan əkəku əh məmə ekegəhan-in-pən in kəm rəhan iərman, kən in təruru əh iərman.

³ Məto iatəgin məmə onəkotahmen e İf itəm Setan təmeiuə in e nəghatən ətehen. İatəgin məmə suah kit otiuw-pən rəhatəmat nətəligən tuwin ik pisin, kən nakotapəs rəhatəmat nolkeikeən o Kristo, itəm in tətuatip məpiə wır.

⁴ İatən nəhlan məto-inu okəmə suah kit tatuwa otəmat matən-iarəp İesu itəm tol pisin e İesu itəm ekoatən-iarəp, o okəmə itəmat nakoatos narmin itəm tol pisin e Narmin nəmotos rəkis, o nakotəto namnusən təwır itəm tol pisin e itəm nəmotos rəkis, məto itəmat ialməl mın, nakotegəhan-in əm.

⁵ Aposol min əh itəm itəmat nakoatən məmə ilat “aposol min ilis pik,” məto e rəhak nətəligən esəplanən məmə ilat ilis maprəkis-in io.

⁶ Okəmə naka kəsəgətun wırən io e nəghatən, məto ekıtun wır nəukətın namnusən təwir. Itimat emotəgətun nat əh kəm itəmat e nolən min rafın nian tepət.

⁷ Nian ematən-iarəp namnusən təwir rəha Uhgın kəm itəmat, esolən məmə nakotətou nat kit. Io atıp əm emos-iəhau io o nıləs-ipərən itəmat. ?Kən tahro? ?Nolən əh in təfagə rat kit? !Kəp!

⁸ Nian ematol wək kitat min itəmat, niməfak min ik pısın kəmoatətou io. İuəhkır tahmen məmə emakläh-in ilat məmə ekasitu etəmat.

⁹ Kən nian kəmoatan, kən rəhak nat kit tikə, esətapəhən o suah kit o nasituən məto-inu pi-atat min itəm kəmotisi-pən Masetonia kəmos-ipa natımnat itəm rəhak tikə. Tol nəhlan, esətapəh-inən nat kit otəmat, kən məsos-ipənən wək əskasık otəmat o nehmən io, kən ekol nəhlan nian rafın.

¹⁰ Tahmen e nıpahrienən rəha Kristo tətətig lak, iatən pahrien məmə suah kit tikə ikın min rafın əpəh Akaea o nən-iəhauən io o nəghat ausitən o nəsətapəh-inən nasituən.

¹¹ ?Kən tahro ekəsətapəh-inən nat kit otəmat, məto-inu esolkeikeən itəmat? !Kəp! Uhgın titun məmə ekolkeike pik itəmat.

¹² Netəmim neen kotalkeike məmə nikitəmat təht ilat məmə kotahmen etimat e wək itəm koatəghat ausit ron. Məto iakatəkəike o nolən rəha

nəsətapəh-inən natimnat məmə rəhalat nəghatən otiet morin.

¹³ Netəm nəhlan, ilat aposol eiueiuə mīn, kən koateiuə-in netəmim e wək rəhalat. ! Kən ilat koatan tahmen məmə ilat aposol mīn pahrien rəha Kristo, məto kəp!

¹⁴ Məto kəsotautən e nolən əh, məto-inu Setan atip, tətən tahmen məmə in nagelo kit rəha nəhag-əhagən.

¹⁵ Kən sənəmə in nat kit itəm okotaut lan, okəmə iolwək mīn rəha Setan kotan tahmen məmə ilat iolwək mīn rəha nolən tətuatip. E namnun nian, ilat okotos rəhalat nətouən tətəu-pən nolən mīn rəhalat.

¹⁶ Ekisimatip mīn. Pəs suah kit tikə nīkin təht məmə io ialmə. Məto okəmə nikitəmat təht nəhlan, kən otegəhan-in io pəs ekol nolən rəha ialmə məsin, kən ekəghat ausit məsin.

¹⁷ Nəghatən u rəhak sənəmə nat itəm İərəmərə təmən-ipa kəm io məmə ekən. Məto iatəghat əm tahmen e ialmə kit.

¹⁸ Netəmim tepət koatəghat ausit o nolən mīn rəha nətueintən, kən tol nəhlan, io mīn, ekəghat ausit.

¹⁹ ! Ei! ! Nakotenatig wīr, kən tol nəhlan, motegəhan-in məmə iaməl mīn kotəgətun itəmat!*

²⁰ Nakotegəhan-in əm okəmə suah əpnapin kit tatol itəmat slef, o okəmə tatos nat kit rəhatəmat e nolən eko-eko, o tatiləs-ipər atip in, o tatem-pən niganəmtitəmat.

²¹ ! İataulis məmə nətəligən rəhatimat təpou pik məmə esotolən nolən rat mīn əh!

* **11:19:** E ves 19-21, Pol tatəghat əsan ilat. Nīpahrienən, in tatən-iahau ilat.

Rəhak nəghatən in talməl, məto nolən naka itəm netəm əh kotəmə okotəghat ausit ron, io mīn, ekəghat ausit ron.

²² ?Tahro? ?Ilat koatən məmə ilat netəm Hipru? Io mīn. ?Koatən məmə ilat netəm Isrel? Io mīn. ?Koatən məmə ilat noanol rəha Epraham? Io mīn.

²³ ?Koatən məmə ilat iolwək mīn rəha Kristo? Io mīn, məto ekaprəkis-in ilat. Kəsi, iatəghat tahmen e ialməl kit. Emol wək pik taprəkis-in ilat, kən kiləs-ipən io e kalapus nian tepət taprəkis-in ilat, kən kəmalis io taprəkis-in ilat, kən iuəhkīr ekimīs nian tepət.

²⁴ Nian faif, noanol rəha Isrel kəmotalis io mau tate-nain.

²⁵ Nian kīsīl, kəmalis io e nīkīlīl. Nian kit kəmaht io e kəpiel apīn. Nian kīsīl emuwīn e nego kən nego tamnīm, kən nian kit emeai əpəh itəhəi lokamnīm o nian apīəpiə kit, lapīn ne nərauiəgən.

²⁶ Nian rafin etaliwək o nolən wək rəhak. Kən iuəhkīr naruə asol tīləs io ekimīs, kən emətatiɡ ikin tasilə ikin imaa iakləh mīn, kən ikin tasilə ikin imaa natimak mīn noanol rəha Isrel, kən ikin tasilə ikin imaa Iaihlua mīn, kən ikin tasilə ikin e taon asol, kən ikin tasilə ikin e ikin taruən-aruən ikin, kən ikin tasilə ikin əpəh itəhəi, kən ikin tasilə ikin imaa piak eiueiuə mīn.

²⁷ Emol pik wək, kən nian tepət esapīlən lapīn. Nian mīn neen, nəumis tus io, kən mətoaəə, kən nian tepət nīgak nagwənən tīkə. Kən nian tepət iatətəp, kən rəhak natimnat təsahmenən o nətəpən.

²⁸ Kən taprəkis-in natimnat mīn əh, nian rafin nīkīk təht pik nīməfak mīn rafin.

²⁹ Okəmә suah kit rəhan nəmegəhən teiuaiu, kən io mīn, rəhak nəmegəhən teiuaiu. Okəmә suah kit tatit suah kit mīn e təfagə rat, kən nīkik tītahmə pīk ron.

³⁰ Okəmә ekəike məghat ausit, kən ekəghat ausit o nat itəm tatəgətun məmə rəhak nəsanənən tīkə.

³¹ Kən Uhgīn, u in Uhgīn ne Tata rəha Iərəmərə Iesu, itəm katiləs-ipər nərgīn nian mīn rafin namnun tīkə, tītun məmə io, eseiuən.

³² Əpəh Tamaskes, etəm-iasol rəha Kig Aretas təməlīn rəhan mopael mīn o nehm wīrən nafilua rəha taon məmə okotegəs-in motaskəlīm motiləs-ipən io e kalapus.

³³ Məto kəmiləs-ipən io e kətim asol kit, kətu-pən nol lan, kiləs-ipən e winta e fenis asol kəmol e kəpiel, kən kəhlman-əhlman tuwīn əpəh ləhau, kən inəh suatip emagīm lan.

12

Nihlīn kit ne nat kit tahmen e napīlaiirən

¹ Ekəike matəghat ausit, nat əpnəpīn təsələn win e nat kit ikin, məto ekəkəike matən natimnat mīn tahmen e napīlaiirən ne nəghatən wi mīn itəm Iərəmərə təmol əp kəm io.

² Ekītun iəfak kit itəm tətahatətə e Kristo.* E nup fotin tinuwīn rəkis, Uhgīn təmīləs muwīn əpəh ilis e nego e neai.† Iəkəruru okəmә nīpətīn tīnatuwīn, o narmīn əm, Uhgīn əm tītun.

11:33: Wək 9:23-25 * **12:2:** Pol tatəghat-in atip. † **12:2:** Nəghatən Kris ətuatip tatən məmə, “neai tatol kisil lan.” Məto nīpətīn tatən məmə “nego e neai u in ikin rəha Uhgīn.”

³ Kən ekən mīn mēmə iəkəruru okəmə nīpətin tīnatuwīn, o narmīn əm, Uhgīn əm tītun. Məto ekītun mēmə suah əh,

⁴ Uhgīn tāmīləs muwīn əpəh iman ikin.‡ Kən in təməto nat anion mīn itəm təsətuatīpən mēmə etəmim rəha nətueintən otən.

⁵ Ekəghat ausit o etəm tol nəhlan, məto esəghat ausit atīpən ron io, məto ekəghat ausit əm o rəhak nolən mīn itəm nəsanənən tīkə elat.

⁶ Məto okəmə ekən mēmə ekəghat ausit, okol esalmələn, məto-inu ekəghat-in nīpahrienən. Məto esəghat ausitən nəhlan, kən tol nəhlan, suah kit tīkə itəm otīləs-ipər io ilis taprəkis nat itəm tətuatīp. Iakolkeike mēmə otəplan ahmen io e nat naka itəm ekən, o ekol.

⁷ Uhgīn təsolkeikeən mēmə etausit o nəghatən wi mīn itəm in təmöl əp kəm io, kən nəghatən mīn əh kotəwīr maprəkis. Kən tol nəhlan təmahlīpa nəratən kəm io tahmen e nihlīn kit təturu nīpətīk. Nəratən əh in iahləpis rəha Setan mēmə tol nəhməən e nīpətīk, kən tol nəhlan esausitən.

⁸ Emuəh nīki İərəmərə mau kisil mēmə otīləs-irəkis ron io.

⁹ Məto tən kəm io mēmə, “Rəhak nəwīrən asol tītun naskəlīmən ik, məto-inu nian rəham nəsanənən tīkə, nəsanənən rəhak tītun nuwamən mol iahgīn e rəham nəmegəhən.” Tol nəhlan, etagien pīk mēmə ekəghat ausit e rəhak nəmegəhən itəm nəsanənən tīkə, mēmə nəsanənən rəha Kristo otatīg e nəmegəhən rəhak.

‡ **12:4:** Nəghatən Kris stuatīp tatən mēmə, “Paradaes” itəm nīpətin tatən mēmə “nego e neai,” ikin itəm netəmim itəm kotətuatīp koatuwīn ikin nian okotimis. **12:7:** Job 2:6 **12:9:** Fil 4:11-13

¹⁰ O nat əh, etagien nian nəsanənən tikə e nɪpətɪk, kən etagien nian katən rat io, kən etagien e nian iəkis mɪn, kən etagien nian katol nəratən kəm io, kən etagien e nian itəm tiəkis ron io. Etagien elat rafin o nərgɪ Kristo, məto-inu nian rəhak nəsanənən tikə, kən iatəsanən.

¹¹ Emol nolən rəha ialməl, məto itəmat əm nəmoatakəike kəm io məmə ekol. Nəməsotiləs-ipərən nərgək, məto təpəwɪr pɪk okəmə nəmotol mihin, məto-inu io sənəmə ləhau e “aposol mɪn ilis pɪk” e nat kit əkəku əm, nat əpnəpɪn io etəm əpnəpɪn əm.

¹² Nian emətan kitat mɪn itəmat, ematol natɪmnat itəm tatəgətun io məmə io aposol pəhrien kit. Ematol nəmtətɪn mɪn, ne nat asol mɪn itəm tol narmɪ netəmim tatiwig, ne nat pɪspɪs mɪn e nɪkitəmat, kən emol e nətəlɪgən rəhak kaifəməh.

¹³ Nat kitɪəh əm eməsolən e nɪkitəmat, eməsətapəh-inən məni kit otəmat. !Otaluin o təfagə rat u rəhak!§

¹⁴ Roiu iatətul matɪp məmə ekɪmnə muag itəmat itəm otol kɪsɪl lan. Kən ekəsətapəh-inən məni kit otəmat, məto-inu esotolkeikeən rəhatəmat nautə, məto iakolkeike əm itəmat. Otətəlɪg-in-tu. Sənəmə wək rəha suakəku məmə otehm wɪr rəhan tata ne mama. Məto in wək rəha tata ne mama məmə okuehm wɪr rəhalau suakəku.

¹⁵ Tol nəhlan, nɪkɪk tagien məmə ekos-ipɪnə rafin rəhak natɪmnat otəmat, kən mos-ipən mɪn rəhak nəmegəhən otəmat. Rəhak nolkeikeən otəmat in tɛpət, məto rəhatəmat ron io in təkəku əm. !Inu təsətuatɪpən!

12:11: 2 Kor 11:5
elat e nəghatən u.

12:12: Rom 15:19
12:13: 2 Kor 11:9

§ **12:13:** Pol tatol mɪlə

16 Pəs kotən məmə esətapəh-inən məni kit otəmat. Məto itəmat neen koatən məmə emos natimnat otəmat e nolən eko-eko.

17 ?Tahro? ?Io emos natimnat e nolən eko-eko nian emahl-ipən netəmim kəm itəmat, o kəp? !Kəp!

18 Emuəh niki Taetas məmə otuwın otəmat, kən mahl-ipən piətət kit ilau min. ?Taetas təsosən natimnat otəmat e nolən eko-eko, o kəp? ? Nəkotitun o kəp məmə, rəhatımlau nətəligən kitiəh əm, kən matioal nolən kitiəh əm?

19 Kəm-naka nikitəmat təht məmə e nəghatən min rafin əh, emotuhalpın nəghatən kəm itəmat itəm suah kit təmən otimat. Kəp. E niğanəmti Uhgın, emoatəghat tahmen e netəm rəha Kristo. Kən iolik min, natimnat rafin itəm koatol, koatol məmə itəmat nakotəsanən.

20 İatən nəhlan məto-inu iatəgin məmə nian ekimnə, kəm-naka ekəplan məmə nəsotolən məmə inu iakolkeike mihin. Kən itəmat min nəkotəplan məmə io esolən məmə inu nakotolkeike mihin. İatəgin məmə ekəplan itəmat neen kotərgəhəu, neen koatetet, neen koatəmərıt e neməha, neen kotəhap-əhap ilat min, neen koatən rat netəmim, neen koatən nıkalın netəmim, neen koatausit, neen koatol əpnapın nat.

21 İatəgin məmə nian ekimnə min, rəhak Uhgın otıləs-iəhau io e niğanəmtitəmat, kən nıkkik otitəgit kən ekasək otəmat neen itəm nəmotol nolən rat əupən, kən məsotəuhlinən ilat o nolən rat min rəhalat itəm koatol nian rafin, inu koatol nolən rat itəm tol naulısən o nənən, kən nəman ne nipitan koatan anion, kən koatol nəhlan əpnapın əm.

13

Namnun nəghatən rəha Pol o nəhgaiirən elat

¹ Inu rəhak naliwəkən itəm tatol kisil lan otəmat. Naoa Rəha Uhgın tatən məmə, “Nian suah kit tatətu-pən nəghatən e suah kit mın, etəmim kəiu o kisil okotəkəike motən nəghatən kitiəh, kən tol nəhlan netəmim kotitun məmə nəghatən koatətu-pən lan, in nıpahrienən.”*

² Nian emımnə otəmat itəm tatol kəiu lan, emən-iarəp rəkis nəghatən o nəhgaiirən e netəm koatol təfagə rat ne itəmat rafın, məmə okotapəs təfagə rat mın. Kən roiu ekən mın nian io əpəh isəu. Nian ekımnə mın, ekol nalpınən kəm ilat itəm kəsotapəsən təfagə rat.

³ Ekotol nəhlan məto-inu nıkitəmat təht məmə rəhak nəsanənən tikə, kən itəmat kotolkeike motitun əsas məmə nian iatəghat, in nəghatən rəha Kristo əm. In təsəpouən o nolən wək itəmat mın, məto rəhan nəsanənən tepət e nıkitəmat.

⁴ Nıpahrienən, nian kəmətu-pər e nıg kəluau, rəhan nəsanənən tikə e nıpətın. Məto tatəmegəh roiu e nəsanənən rəha Uhgın. Kən e nolən kitiəh, rəhatımat nəsanənən tikə e nıpətımat, məto itımat ekotəmegəh itımat Kristo e nəsanənən rəha Uhgın, kən nian ekotəghat kəm itəmat, onəkotəplan nəsanənən əh.

⁵ Itəmat atıp, otakil wır nəmegəhən rəhatəmat məmə rəhatəmat nahatətəən in pahrien, o kəp. Itəmat atıp, nakotehm wır rəhatəmat nolən. ? Nəkotitun o kəp, məmə Kristo Iesu tətatig e

* **13:1:** Dut 19:15 Kəm-naka, Pol tatən məmə rəhan naliwəkən kisil tahmen e nəghatən rəha netəmim kəiu o kisil. **13:1:** Dut 19:15; Mat 18:16; 1 Tim 5:19 **13:4:** Fil 2:7-8

nāmegāhən rəhatəmat? !Məto okəmā rəhatəmat nāmegāhən təsətəu-pənən nolən rəha nahatətən, kən Kristo təsətiḡən e nāmegāhən rəhatəmat!

⁶ Kən emələhəu-pən əskasik rəhak nətəliḡən māmə onəkotəplan māmə itimat aposol min pahrien.

⁷ Kən roiu, ekoatəfak kəm Uhgīn māmə itəmat kit təsələn nat kit tərət. Esotolkeikeən nəhlan māmə otəḡətun māmə rəhatimat wək e nikitəmat in təwir mətuatip. Məto ekotolkeike māmə itəmat nəkoatol nolən itəm tətəuətəp, nat əpnəpīn netəmim neen koatən māmə wək rəhatimat tərət.

⁸ Tol nəhlan məto-inu okol itimat esotolən nat kit itəm tahtosiḡ-in nīpahrienən, məto ekotitun nolən əm nat itəm tatiləs-ipər nīpahrienən.

⁹ Nīkitimat tagien nian itimat ekotitun nolən u, itəm nəsanənən tikə lan, məto nāmegāhən rəhatəmat tatətul əskasik. Kən nəfakən rəhatimat otəmat māmə nāmegāhən rəhatəmat tahmen o nətəu-pənən suatip ətuatip.

¹⁰ Nian io əpəh isəu otəmat, ekəte nəhlan o nat kit. Iərəməərə tinos-ipa rəkis nepətən kəm io, məto esolkeikeən māmə nian ekimnə otəmat, ekəike mol əskasik etəmat e nepətən əh. In təmos-ipa nepətən əh māmə ekiləs-ipər itəmat, sənəmā māmə ekərəkīn itəmat.

Namnun nəḡhatən

¹¹ Piak min ne wīnik min. Inu rəhak namnun nəḡhatən. Otagien. Otəuhlin rəhatəmat nolən min. Otətə rəhak nəḡhatən. Otuwa e nətəliḡən kitiaḡ. Otatiḡ e nəməlinuən. Kən Uhgīn rəha nolkeikeən ne nəməlinuən otatiḡ itəmat min.

¹² Otən təwİR kəm itəmat mİN tahmen məmə itəmat kitİəh əm e Kristo.

¹³ İəfak mİN rafİN koatən-İpİNə təwİR kəm itəmat.

¹⁴ Pəs İərəmərə İesu Kristo otawte-İN rəhan nəwİRən kəm itəmat rafİN. Kən pəs UhgİN otos-İpən rəhan nolkeİkeən kəm itəmat rafİN. Kən pəs NarmİN Rəha UhgİN otol nİKİtəmat rafİN tol kitİəh.

North Tanna New Testament
The New Testament in the North Tanna Language of
Vanuatu
Le Nouveau Testament dans la langue du Nord Tanna
de Vanuatu

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

46e9a2b5-26b8-5301-a079-623f3a20ef8b